



Curdin Orlik (a san.) ed Armon Orlik, ils dus lutgaders grischuns.




Da la partida a la saira da gala èn er stads Heinz Günthardt, il co-commentatur da tennis dad SRF, e sia dunna Cecila Günthardt.



Adina preschents èn er l'anteriur skiunz Kristian Ghedina e sia partenaria Patrizia Auer.



L'anteriur star dal HCD Reto von Arx (a san.) cun l'anteriur skiunz Paul Accola.



Èn s'entupads tar l'occurrenza: Karl Frehsner ed il skiunz Carlo Janka.



Undraziun per l'organisatur e per sportists e sportistas: Alessandro Sellitto, Stephan Lichtsteiner, Jeannine Gmelin, Martina Hingis, David Schnabel e Christian Maurer (da san.).

FOTOS G. N. STGIER

Ina saira da gala superlativa

Tavau: 14. ediziun da la «Notg da sport»

DA GION NUTEGN STGIER / ANR

■ Passa 500 personas èn stadas da la partida a la saira da gala en il center da congress. Cun ina «Standing Ovation» ha il public beneventà ils dus stars da la saira Martina Hingis e Stephan Lichtsteiner. Ina giada dapli è la «Notg da Sport Tavau» stada ina gronda gala cun blera prominenz d'anteriurs ed actuals sportists e sportistas. Sche Alessandro Sellitto, l'organisatur, envida a l'occurrenza caritativa, lura vegnan ses amis da sport gugent a Tavau per assister a la saira nua che sportistas e sportists vegnan undrads cun in cristall. Sco adina è il retgav da la «Notg da Sport Tavau» i a la Fundaziun «Wings for Life», ina organisaziun da perscrutaziun cunter paraplegia. L'intent da l'event da gala saja da dar a sportistas e sportists ina plattafurma per s'entupar, d'undrar ellas ed els per lur prestaziuns extraordinarias e lura saja er l'aspect caritativ da fitg gronda impurtanza, ha ditg Sellitto durant la saira da gala.

Ina occurrenza da vaglia

Beneventada è la blera prominenz er vegnida da Tarsisius Caviezel, il landamma da Tavau. La «Notg da Sport Tavau» saja ina occurrenza da vaglia sco strusch in'autra quai che pertutga glischur e pumpa. Grazia als buns contacts d'Alessandro Sellitto s'inscuntra la prominenz

za da sport adina a l'entschatta da la stagiun d'enviern e procura gia intginas emnas avant Nadal per in temp glorius. Cun gronda passiu segnan Sellitto e ses team per l'organisaziun da l'occurrenza e quella passiu hajan cunzunt er las sportistas ed ils sportists che vegnan adina undrads. Passiu maina adina tar success, saja quai en la vita ubain er en il sport, ha ditg Caviezel. A Tavau hajan lieu mintg'onn a l'entschatta da la stagiun gronds events sco la «Notg da Sport Tavau», Tavau Nordic, la Cuppa Spengler ed «Art on ice» e quai sajan occurrenzas da renum internaziunal e testifitgeschian l'abilitad dal lieu da savair organisar tals gronds events, ha ditg Caviezel.

Vegnida gugent a Tavau

In di suenter la gala da cumià a Turitg en l'Hotel Dolder saja ella vegnida gugent a Tavau, ha ditg Martina Hingis. Da vegnir undrada saja adina ina chaussa fitg emozionala e cunzunt er in'onur. Ella è sa mussada tut cuntenta cun retschaiver il cristall per sia gronda carriera ch'è ida a fin avant intgins dis. Ussa vegnia ella a sa dedigar pli fitg al chavaltgar, ses grond hobbi, e lura er a la scola da tennis da sia mamma. Ultra da quai sa legria ella d'avair dapli temp per ses um, per ses amis e per tut las personas che hajan er contribuì bler a tut ses success, ha ditg Hingis.

Cun autist da Torino a Tavau

Bunamain sco in retg han ils preschents retschet Stephan Lichtsteiner, il chapitani da la squadra naziunala da ballape e defensur tar Juventus Torino. El è vegnì dal nord da l'Italia en il Grischun cun in autist. Gia la damaun baud èn el e sia dunna danovamain partids en direcziun Torino cun star la dumengia sin il program in giu per la «Juve». El saja pertschert che questa stagiun haja ses club per in pau dapli concurrenza cun Napoli ed Inter Milan, però la finamaira saja da guadagnà il 7avel titel en seria. Cun l'equipa naziunala vul Lichtsteiner cuntanscher en Russia tar il campinadi mundial 2018 almain il quartfinal. Quai ha el ditg en discurs cun il moderatur da la saira Roman Kilchsperger.

Anc trais undraziuns

Dasper Hingis e Lichtsteiner èn anc dus sportists ed ina sportista vegnids tar onur tar la «Notg da Sport Tavau». In da quels è Christian Maurer, il Bernais che tutga tar ils megliers parasguladers da l'entir mund. In cristall ha er survegni David Schnabel, l'atlet da la Germania ch'è vegnì otg giadas campin mundial en la disciplina ciclissem d'art. El ha gist mussà sias capacitads sin il velo ed intgantà il public cun sia show. Jeannine Gmelin è l'emprima rembladra svizra che ha guadagnà la medaglia d'aur tar in Campinadi mundial da remblar. Er ella è vegnida undrada per quella prestaziun cun in cristall.



Manà tras il program en moda divertenta ha Roman Kilchsperger.